



ANG

Paghimakas

★ Pabayagan sang Partido Komunista sang Pilipinas ★ Isla sang Negros

Ginaubayan sang Marxismo-Leninismo-Maoismo

HULYO 2025

Noynoy Ponteras: Huwaran nga kadre sang Partido, palangga sang masang pigos kag ginahimuslan

*Komiteng Rehiyunal sang Partido sa Isla sang Negros
Hulyo 2025*



ANG KABUHI SANG ISA KA rebolusyonaryo puno sang sakripisyo kag kabudlayan, kag sa pinaka-punta sini—kapareho sa tanan man nga kabuhi—ang katugbang nga kamatayon. Handa ang kada isa ka rebolusyonaryo nga ihalad ang kabuhi para sa bulawanon kag madi-nuguon nga banas kon kinahang-lanon.

Subay sini, ginapasidunggan sang Communist Party of the Philippines (CPP) sa Isla sang Negros si Noynoy 'Ka Jojo' Ponteras, sa iya amot bilang isa sa mga namuno nga kadre sang Partido sa pag-pauswag sa demokratikong rebolusyon sang banwa partikular sa isla, sa tunga sang masingki nga kontrarebolusyon sang rehimen US-Marcos II.

Sang Marso 7, alas 8:00 sang gab-i, gin-abdak sang mga pasistang reaksyonaryong tropa sanday Ka Jojo kag Marisa 'Ka Kim' Pobresa sa isa ka lugar sa Bacolod City, Negros Occidental, gintortyur antes ginsalbeyds kag gindala ang ila bangkay sa Sityo Paraiso, Brgy. Caduhaan, Cadiz City sa amo gi-hapon nga probinsya. Ginhinabonan sang Philippine National Police (PNP) kag Armed Forces of the Philippines (AFP) ang ila krimen sa pagpatay sa duha ka mga *hors de combat*, sa ngalan sang pekeng engkwentro.

Mabug-at sa Partido ang kamatayon sang kada isa ka kaupod, apang sa pihak nga bahin ginabubayan ini sang rebolusyonaryong optimismo nga madamo pa nga mga maayo nga rebolusyonaryo

"Noynoy..." sundan sa pahina 3

Halangdon nga Kaupod

ni Ka Shenji

Ang kabag-uhon kag kadugayon
Burges man ukon sandigan
Batan-on man ukon tigulang
Indi basehan sang rebolusyonaryong talaksan.

Katampad, determinasyon, pagkapursigido gin-uyatan
Matungdan gin-atas nga tulungdan
Wala sang pang-alang-alang
Bisan pa mabudlay kay puno sang katalagman.

Ang pagkasimple kag prangka
Pagka-praktikal halin sa sandigan nga eksperyensiya
Indi rikot kag kumplikado estoryahon
Makapasanag sa nagagumon nga pamensaron.

Ang indi arogante kag mapainubuson
Makapahagan-hagan sa nagasingki nga balatyagon
Ang matam-is nga yuhom kag mabugnaw nga lanton
Makapahaw-as sa ginabatyag nga kahangaw-on.

Iwag ka sa madulom kag masibod nga lalakton
Ubay sa tunokon nga direksyon
Sa mga nabudlayan kag nagapangduha-duha
Sa banas nga may tugalbong sang mga buaya.

Ining imong mga kinaiya halangdon
Nadula ka pero amon ini pangitaon
Permi ka magtudok sa amon pamensaron
Sa matag-adlaw nga padayon nga
pagtahak namon sa
rebolusyon.

Paalam Kaupod!!!

*Halad nga binalaybay
para kay Ka Kim
Marso 20, 2025*



HULYO 2025
ISPESYAL NGA ISYU

ANG *Paghimakas*



angpaghimakas@protonmail.com



negrosrevportal.wordpress.com

Nagapasalamat ang *Ang Paghimakas* sa mga kontribusyon agud mangin madinalag-on ang ini nga isyu. Sa pagpauwag sang aton *Ang Paghimakas*, ginapangabay sa tanan nga bumalasa nga padayon nga mag-amot sang mga balita, piktyur, istorya kag iban pa nga sinulat. Nagapangayo man kami sang inyo mga suhestyon kag komentaryo paano pa gid ini pauswagon.

"Noynoy..." *halin sa pahina 2*

kaangay ni Ka Jojo ang magasunod kag magapadayon sa pagpanday kag pagpauswag sa armadong paghimakas tubtob sa lubos nga kadalagan sang sahing pigos kag ginahimuslan. Katugbang sa kabug-at sang kamatayon ni Ka Jojo ang iya malahalón nga mga amot sa rebolusyon nga napagkit na sa kasaysayan.

Nabun-ag si Ka Jojo sadtong Oktubre 18, 1977 sa Hinobaan, Negros Occidental. Sang nadulaan sang trabaho ang iya amay sa pagsarado sang Insular Lumber Company Inc. (ILCO) sadtong 1983, nagsalhin ang ila pamilya sa Brgy. Banago, Bacolod City kag diri na sya nagdaku.

Nakalab-ot sa kolehiyo si Ka Jojo sa kursong Bachelor of Science in Commerce sa Colegio de San Agustin-Bacolod, apang nag-untat sa ikaduha nga tuig para magpultaym sa rebolusyonaryong kahublagan. Nakamuklat siya sa mga isyu sang katilingban sang nag-entra sa isa ka organisasyon sang pamatan-on sang simbahan sa ila lugar kag nanging katapo man sang *choir*. Nanging tsirman siya sang amo nga organisasyon nga aktibo sa mga rali kag naghimo sang mga pasundayag kultural.

Napukaw ang pungsodnon demokratiko nga kamuklatan ni Ka Jojo sa hanay sang pamatan-on kag imol nga taga-syudad sa tunga sang Ikaduha nga Dunganon nga Kahublagan Panadlong. Sa aktibo nga paghulag kag paglubog sa mga erya

diin mabaskog ang paghimakas masa, napanday ang iya malig-on nga panindugan sa paghalad sang kabuhi para sa masang pigos kag ginahimuslan. Nanging pinakabata siya nga katapo sang komiteng tigpatuman sa organisasyon sang mga imol nga taga-syudad sa Bacolod City nga nag-atubang sa malaparan nga pagpamatuk sa *ejection* kag demolisyon sa mga komunidad. Siya man ang pinaka-una nga tsirman sang Anakbayan-Metro Bacolod sadtong 1998 nga nagpukaw, nagorganisa kag nagpahulag sa pamatan-on estudyante kag mga *out of school youth* sa nagkalain-lain nga mga isyu sang pumuluyo.

Sa proseso sa pagpanday sang iya proletaryong panglantawan, panindugan kag pamaagi, nanging lubos nga katapo sang Partido Komunista si Ka Jojo sadtong 1999. Bilang katapo sang Partido, ginsuong niya ang panghangkat sang Partido nga maglubog agud pukawon, organisahon kag pahulagon ang masang mangunguma, ilabi na ang malapad nga mga mamumugon sa kampo sa isla. Nanging katapo siya sang *mass work unit* sang pesante nga nagorganisa sa mga asyenda sa ikatatlo nga distrito sang probinsya. Isa man si Ka Jojo sa nagpangunga sa madinalag-on nga paghimakas masa batok sa Philippine National Oil Company (PNOC) sa Brgy. Mailum, Bago City, Negros Occidental sa diin ginpalayas ang mga mangunguma sa ila duta.

"Noynoy..." *sundan sa pahina 4*



*Kinabuhi nga gihalad mo para sa Negrosanon ug sa nasud,
ang imong maayong mga binuhatan,
dili masayang ug dili makalimtan
sa masang gidaugdaug ug gihimuslan.*

*Sakit man dumdumon nga wala kana,
pero ang imong kamatayon bug-at pa
sa bulkan nga nibuga ug mga maayong kasinatian
nga pwedeng kuhaan ug leksyon para sa sunod nga henerasyon.*

*Sa imong pagpahilayo ikaw gihandum sa masa ug kauban,
ang imong dako nga tampo sa rebolusyon
kini dili mawala hangtod sa katapusan.*

*Dili ikalalis ang kamatuoran nga imong gipamatud-an
ang imong hugot nga determinasyon ug kaandamon
nga ihalad ang imong kinabuhi para sa rebolusyon.
Dugang kini nga hagit ug kadasig sa mga kauban nga mupadayon,
ug magremolde sa kaugalingon para sa pangmalahutayon nga rebolusyon.
Ug dugang kakahas para isulong ang pangkalibutanon nga gimbuhaton
para gubat sa katawhan magmalampuson.*

***Ka JB Regalado
Tigpamaba sa Leonardo Panaligan Command
New People's Army Central Negros Guerrilla Front***



"Noynoy..." halin sa pahina 3

Nakita ni Ka Jojo ang kahustohon sang ar-
madong rebolusyon, amo nga gilayon siya nga
nagpatapo sa yunit sang New People's Army
(NPA) kag nagkadto sa kabukiran sadtong 2003.
Isa sa nangin una niya nga tahas ang *guerilla
zone preparation* ukon pagpreparar sang erya
para sa pagsulod sang mga Pulang hangaway
para matukod ang larangan gerilya. Kabahin na
subong ang erya nga iya nga ginhulagan sa lima
ka larangan gerilya sa isla.
Sa sulod sang NPA, natun-an ni Ka Jojo
paano ang pagtukod sa Partido, pagkonsolida sa
masa kag pagpabwelo sa kontra-pyudal nga mga
kampanya sa kaumhan. Sa giya sang mga kaupod
sini nga panahon ilabi na sanday Ka Frank
Fernandez, Ka Cleofe Lagtapon kag Danilo "Ka
Maoche" Bertolano, dugang nga napauswag ni Ka
Jojo ang iya madalom nga paghangop sa linyang

masa kag husto nga sandigan nga aktitud sa
pagpakighalubilo sa masa nga hugot niya nga gin-
uyatan sa pagpatuman sa bisan ano nga re-
bolusyonaryong hilikuton.
Tuig 2011 sang nangin katapo si Ka Jojo sa
Komiteng Rehiyon sang Partido sa Isla sang
Negros kag 2017 napatapo sa Komiteng Tig-
patuman sang Rehiyon. Nagapanguna niya nga
responsibilidad ang hilikuton pinansya kag
alyansa. Kon ano siya ka kakahas sa pag-atubang
sa mga kaaway sa sahi, amo man si Ka Ted ka init
sa pakighalubilo sa kaupod kag masa. Permi niya
nga ginapaathag nga ang pinakatuburan sang
ekonomiya sang rebolusyon ang pagsalig kag
pagsandig sa masa. Suno sa iya, indi pwede
ibaylo ang kaayuhan sang isa ka agalon kontra sa
kaayuhan sang gatusan ukon liboan ka mangu-
nguma.

"Noynoy..." sundan sa pahina 5

Pulang saludo kay Ka Jojo!

Ginsaludohan sang mga Pulang kumander kag hangaway sa idalom sang Roselyn Jean Pelle Command-New People's Army (RJPC-NPA) ang pagkabaganihan ni Noynoy 'Ka Jojo' Ponteras upod kay Marisa 'Ka Kim' Pobresa nga gin-abdak kag ginsalbeyds sang mga berdugong reaksyonaryong tropa sadtong Marso sa Bacolod City, Negros Occidental.

Sa pihak sang madamo nga hangkat, ginpakita ni Ka Jojo ang indi malingkang nga panindugan sa rebolusyon, ang wala tupong nga pagkadeterminado sa pag-alagad sa katawhan kag pagkatutom sa pagpatuman sang iya mga tahas.

Mangin ehemplo sa paghulag sa kada Pulang hangaway ang iya mga inagihan kag amot sa dugang nga pag-uswag kag pagsulong sa rebolusyonaryong kahublagan.

Mabuhay si Ka Jojo kag ang tanan nga mga martir nga naghalad sa ila kabuhi alang sa masang pigos kag ginahimuslan!

Mensahe sang Roselyn Jean Pelle Command - New People's Army Northern Negros Guerrilla Front

"Noynoy..." halin sa pahina 4

Permi nga ginapahanumdom ni Ka Jojo ang simple nga pagpangabuhi kag matutom nga paghimakas. Masami nga madumduman sang mga kaupod ang iya pagkasuod sa mga masa kag permi man nga nagapalibog paano makabulig sa sitwasyon sang masa kag kaupod.

Sa katapusan nga bahin sang 2022, nangin katapo sang Kalihiman sang Komiteng Rehiyon (KHKR) sang Partido si Ka Jojo. Sa iya pagpamuno, nanikasog ang Partido nga mapatuman ang ikatatlo nga kahublagan panadlong kag padayon nga atubangon ang kapintas sang kaaway. Upod sa iya pagtinguha, amat-amat nga ginpangibabawan sang mga rebolusyonaryong pwersa kag organisasyon ang empirisismo, para mapabaskog liwat ang kahublagan sa tunga sang peke nga mga deklarasyon sang kaaway nga 'insurgency-free' na ang isla sang Negros.

Indi na mapanas ang malahalon nga amot ni Ka Jojo sa rebolusyon. Kadungan sa kasubo sa iya pagka-martir, ginabaton sang mga kaupod kag pumuluyo ang hangkat nga ipadayon ang iya pagkamatutom nga rebolusyonaryo. Liboan pa ka Ka Jojo ang magatuhaw sa dalagan sang pangmalawigon nga inaway banwa, nga magasunod sa iya pagka-prinsipyado, organisado, kag determinado sa pagpatuman sang mga tahas bisan pa man nga kabuhi ang ihalad.

Mabuhi si Noynoy 'Ka Jojo' Ponteras!

Mabuhi ang mga baganihan kag martir sang rebolusyon! *RP*



Bahandi sang Paghimakas

ni Ka Shenji

Tuman nga kasubo nabatyagan
Sa imong kalit nga pagtaliwan
Indi mabaton sang panghuna-huna
Kasan-o lang updanay kita subong wala ka na.

Dako nga kapung-aw pagkadula
Sa kasubong mo nga kaupod
Sa paghimakas nagapadayon
Bisan pa sa ital-ital nga panahon.

Indi malipatan ang imo kaisganan
Bisan sa ipit-ipit nga kahimtangan
Atake sang berdugong kaaway napangibabawan
MLM gingamit nga hinganiban.

Dalayawon ang imo pagkabalaka
Sa sin-o man nga nagakinahanglan sang pag-amuma
Wala sang pili kadre man ukon masa
Itanyag ang kamot para sapupohon sila.

Tuman nagbatyag sang pagkangilin
Mga pinasahi nga kaupod nga namartir
Kabuhi ginhalad nga wala pang-alang-alang
Matungdan lamang rebolusyonaryong hilikuton para sa
kahilwayan.

Mga bahandi kamo sang paghimakas
Inyo kinaiya kag hinimuan
Sa amon balatyagon kag panghuna-huna
Indi gid tubtob san-o man makalimtan.

Gani,

Maso kag karit aton uyatan
Isinggit sa kabukiran kag kasyudaran
Rebolusyon ang solusyon
Mabugras kadena sang pagkaulipon
Hustisya sa mga martir sang rebolusyon!!!!

Halad nga binalaybay para kay Kaupod Jojo
Marso 19, 2025

